

日藏中國古籍書志

〔日〕河田龍撰 杜澤遜等點校

靜嘉堂秘籍志

下

日藏中國古籍書志

〔日〕河田巖撰

杜澤遜 李寒光 張學謙 戚昕 趙晨
李霞 苑磊 茹莉君 程遠芬 點校

靜嘉堂秘籍志

下

上海古籍出版社

靜嘉堂秘籍志卷三十八

別集類 八

玉楮詩稿

宋岳珂撰，十六世孫岳元聲等校。

刊二本。

志

玉楮詩稿八卷

舊抄。

抄本今佚。

宋相臺岳珂肅之著。

自序。嘉熙庚子閏月。

又跋。

案：

《提要》珂見館宋樓本《魏鄭錄》。

云：

此集凡詩三百八十五首，志所載自序作三百五十

八。其編年起理宗嘉熙戊戌，迄於庚子。珂《程史》稱紹熙壬子年十歲，則是集其五十八歲所編。名曰《玉楮》。蓋取《列子》刻玉爲楮葉〔一〕，三年而成之意也。中略。王士禎《居易錄》稱是集流傳絕少。安邱張貞得高唐王家舊抄本，乃錄而傳之。蓋亦罕覯之笈矣。

〔一〕「刻玉爲楮葉」，事見《韓非子·喻老》。

棠湖詩稿

宋岳珂撰。

抄一本。

《斷腸集》、《吳允文集》合抄。

志

棠湖詩稿一卷 鮑以文手校本。

宋岳珂撰。

案：《提要》存目云：

茲編乃所作宮詞一百首，皆咏北宋之事。前有珂自序，稱棠

湖綸釣之暇，適有猶子從軍自汴歸，誦言宮殿鐘簾，儼然猶在。慨想東京盛際，文物典章之偉觀，聖君賢相之懿範，輒用王建體，成一百首。以示《黍離》宗周之末志云云。其本爲鮑氏知不足齋所刊。宋以來公私書目，悉不著錄，不知其所自來。中略。昔厲鶚作《宋詩紀事》，凡鮑氏藏書無不點勘，今所進本，標識一一具存。獨無一字及此書，則出在鶚後矣。疑鶚及符曾等七人，嘗合作《南宋雜事詩》，而其《北宋雜事詩》則未及成書。或遺稿偶存，好事者嫁名於珂耶。

棠湖詩稿

同上。

抄一本。

《春卿遺稿》、《金陵雜咏》、《郴江百咏》、《燕堂詩稿》、《志道集》合抄。

此本《藏書志》不載。

煤塾集

宋徐元杰撰。

抄四本。

志

煤塾集十二卷 文淵閣傳抄本。

宋徐元杰撰。

趙汝騰序。淳祐己酉四月。

案：《提要》《永樂大典》本。云：元杰，字仁伯，信州上饒人。紹定五年進士第一。累官國子祭酒，權中書舍人，拜工部侍郎。諡忠愍。事蹟具《宋史》本傳。元杰侃直敢言，不避權勢。當史嵩之起復，元杰攻之甚力，卒寢成命。後元杰以暴疾卒，人皆以爲嵩之毒之。臺諫及太學生徒俱爲上疏訟冤，詔置獄追勘，迄不能白。本傳頗載其事，而周密《癸辛雜識》所記尤詳。中略。其集不載於《宋史·藝文志》。觀其子直諒跋語，乃景定二年直諒知興化州時所刊本。二十五卷。世久失傳。今從《永樂大典》中採輯編次，釐爲雜文十一卷、詩詞一卷。雖僅存十之五六，而本傳所列奏議條目具存，尚可得其大槩。

耻堂存稿

宋高斯得撰。

刊三本。武英板。

《藏書志》不載。

案：《提要》八卷，《永樂大典》本。云：斯德，字不妄，邛州蒲江人。紹定二年進士。歷官端明殿學士，簽書樞密院事，兼參知政事。爲留夢炎所構，罷官予祠。宋亡，隱居苕霅間而卒。事蹟具《宋史》本傳。中略。案：本傳載斯得所著有《耻堂文集》，明葉盛《菴竹堂書目》亦有《耻堂集》七冊，而皆不言卷數。其後遂亡佚不傳。厲鶚撰《宋詩紀事》，亦無斯德之名。今從《永樂大典》各部〔二〕中掇拾排次，釐爲文五卷、詩三卷。

〔二〕部，《四庫提要》作「韻」。

秋崖小稿

宋方岳撰。

明刊七本。

志

秋崖先生小稿四十五卷詩集三十八卷 明刊本。

宋方岳巨山撰。

李汛序。嘉靖六年春。

方謙序。嘉靖丙戌九月。

案：《提要》作《秋崖集》四十卷，云：岳，字巨山，號秋崖，歙縣人。紹定五年進士。淳祐中，爲趙葵參議官。移知南康軍，以杖舟卒忤荆帥賈似道。後知袁州，又忤丁大全，被劾罷歸。其集世有二本：一爲《秋崖新稿》，凡三十一卷，乃從宋寶祐五年刻本影抄。一爲《秋崖小稿》，凡文四十五卷、詩三十八卷，乃明嘉靖中其裔孫方謙所刊。今以兩本參校，嘉靖本所載較備。然寶祐本所有，而嘉靖本所無者，詩文亦尚各數十首。又有別行之本，題曰《秋崖小簡》，較之本集，多書札六首。謹刪除重複，以類合編，並成一集，勒爲四十卷。

秋崖先生集

同上。

舊抄十本。

志

秋崖先生小稿八十四卷 舊抄本。

宋方岳巨山撰。

蒙川遺稿

宋劉黻撰。

舊抄一本。

志 蒙川先生遺稿四卷 舊抄本。

宋劉黻〔一〕撰，山中劉應奎校正，後學阮存存耕編次。

弟應奎序。大德歲上元日。

案：《提要》云：

黻，字聲伯，號質翁，樂清人。淳祐初，以試入太學，伏闕上書攻

丁大全，送南安軍安置。大全敗後，召還廷試，又以對策忤賈似道，復爲所抑。後由昭慶軍節度掌書記，除學官，擢御史。累官至吏部尚書，遭母喪解官，遂不復起。會宋亡，二王航海，黻追從入廣，至羅浮而卒。諡忠肅。所著有《諫坡奏牘》、《薇垣制稿》、《經帷納獻》諸書。航海時，挾以自隨，遂散落不存。此詩文殘稿四卷，乃其弟應奎所哀集也。惟傳抄既久，文多譌脫，更無別本可校。爲足惜耳。

〔一〕河田眉批：黻，當作「黻」。

北澗〔一〕集

宋僧居簡撰。

抄二本。

志 北澗文集十卷 吳尺鳧舊藏。

宋釋居簡撰。

張自明叙。嘉定丁丑十月。

案：《儀顧堂題跋》云：「《北澗文集》十卷，宋釋居簡撰，舊抄本，得之上海郁氏。以向藏本校之，以下舉缺脫字，今略。此本皆不缺，洵善本也。其文爲吾郡作者尤多，以下舉題目，又略。皆足資吾郡掌故。湖隱方圓叟《舍利塔銘》，即俗所傳濟顛者也。道濟，一號湖隱，又號方圓叟，亦世所罕知者。文頗簡鍊，無南宋冗長之習。」又云：「北澗頗精鑒別，故集中書畫題語多中肯。其跋《廟堂碑》云：『虞書《廟堂碑》，唐人駸駸晉人者，自南北壤斷，賈迹實繁』云云，則翻本中又有翻本矣。其跋《九成宮碑》云：『《化度寺記》、《醴泉銘》，習之者往往失其韵致，但貴端莊如木偶，假刻誤人，人亦罕識真』云云。據此可見南宋時《醴泉銘》覆本之多，今之肥而無生趣者，恐未可據斷爲原石也」。《提要》云：「居簡，字敬叟，潼川王氏子。嘉熙中敕住淨慈光孝寺。因寓北澗，日久故以名集。其集詩文各爲一編。此則皆其所作雜文也。」

是本有「郁松年印」「白文」「泰峰」「朱文」「方印」。

- 〔一〕 澗，《碩宋樓藏書志》、《儀顧堂題跋》、《靜嘉堂文庫漢籍分類目錄》均作「磻」。下同。
- 〔二〕 澗，《四庫提要》作「磻」。

北澗集

同上。

舊抄三本。

志

北澗文集十卷 趙谷林校抄本。 汪啓淑舊藏。

宋釋居簡撰。

張自明序。

吳氏趙氏之譌。手跋曰：鈔《北磻集》三冊，均有脫誤，而挖訖姍姍之謬，惟此冊最夥。以朱墨圖乙之，幾成紅勒帛矣。乙巳三伏日，樂城谷林意林揮汗校。

有「新安汪氏」朱文、「啓淑信印」白文二方印。

字溪集

宋陽枋撰。

抄四本。

志 字溪集十一卷附錄一卷 文淵閣傳抄本。

宋陽枋撰。

案：《提要》《永樂大典》本。云：枋，字宗驥，初名昌朝，巴川人。居字溪小龍潭之上，因以自號。端平元年冠鄉選。淳祐四年以蜀難免入對，賜同進士出身。闕帥交辟，於昌州監酒稅，於大寧爲理掾，於紹慶爲學官。晚以子炎卯貴，加朝奉大夫，致仕。年八十一卒。其行履不見於史傳。惟《文淵閣書目》載有陽《字溪集》之名，而不著卷數。黃虞稷《千頃堂書目》則稱其集爲十二卷。久無傳本。今檢勘《永樂大典》所載，哀而集之，附以其子所作年譜、行狀，仍析爲十二卷。適符原目之數。雖已經割裂，未必無所殘闕。然所佚似亦無多矣。

勿齋集

宋楊至質撰。

抄一本。

志

勿齋集二卷 文淵閣傳抄本。

宋楊至質撰。

案：《提要》云：

至質，字休文，號勿齋，閬阜山道士。淳祐中敕賜高士，右街鑒

儀，主管教門公事。是集皆四六書啓，多與一時當事酬答之作。中略。至質所作，雖邊幅

少狹，而對偶工緻，吐屬雅潔。猶有《樊南甲乙集》之遺，正未可以方外輕之矣。

幸松垣集

宋幸元龍撰，後裔明幸鳴鶴編釋。

抄一本。

志

重編古筠洪城幸清節公松垣文集十一卷 抄本。

宋賜進士第通議大夫松垣幸元龍震父著。

幸鳴鶴序。萬曆丙辰。

案：《提要》存目云：

元龍，字震父，高安人。《宋史》不爲立傳。據集中所言，嘗

舉進士。理宗朝任通奉郎、郢州通判。以論史彌遠爲陳賅所劾，罷歸。是集《宋志》亦不

著錄。所載凡疏三篇、書四篇、記事六篇、序一篇、行狀一篇、墓誌銘一篇、詩十首。前有

像贊及傳，今已佚。後爲事蹟一卷，載所判岳飛、萬俟卨子孫爭田事，不知何人所記。疑

即集中稱濱谷居士者所爲。濱谷，名鳴鶴，即元龍後裔，搜輯遺稿，編成此帙者也。詩文

各繫以評語。間有注釋，亦頗疎略。元龍事蹟無考。其題曰《幸清節公》，亦莫詳其得諡之由。首篇論國是疏內，自引所作與陳晔、劉之傑二律，而終之曰「二詩之意切矣。殊非臣子對君之體。他文亦多鄙淺。而詩謂一篇爲一韻，尤古無是例。殆出依託。」

姚雪坡文集

宋姚勉撰。

舊抄六本。

志

雪坡姚舍人文集五十卷

舊抄本。

朱竹垞舊藏。

宋姚勉撰，從子國學生龍起編次。

文及翁序。景定五年六月。

方逢辰序。

景定癸亥八月。

案：

《提要》云：

勉，字述之，一字成一，高安人。寶祐元年以詞賦擢第，廷對萬言

策第一。除校書郎兼太子舍人。《宋史》無傳。是集《藝文志》亦失載。此本爲其從子龍起所編。凡奏對牋策七卷、講義二卷、賦一卷、詩十一卷、雜文二十九卷。勉受業於樂雷發，詩法頗有淵源。雖微涉麤豪，然落落有氣，文亦嫻雅可觀，無宋末語錄之俚語。外間傳本頗稀，譌闕特甚。今以《永樂大典》所載，各爲校補。其《永樂大典》不載者，則仍其舊。

卷中有「朱彝尊錫鬯氏」白文方印。

文山集

宋文天祥撰。

明刊十本。

志

文山先生文集二十卷 明張元論刊本。

宋文天祥撰。

羅洪先序。嘉靖三十九年。

案：《提要》作二十一卷，云：天祥事蹟具《宋史》本傳。中略。元貞大德間，其鄉人

搜訪，編爲前集三十二卷、後集七卷，世稱道體堂刻本。明初其本散佚，尹鳳岐從內閣得之，重加編次，爲詩文十七卷。起寶祐乙卯，迄咸淳甲戌。皆通籍後及贛州以前之作。江西副使陳价、廬陵處士張祥先後刻之。附以《指南前錄》一卷、《後錄》二卷、《吟嘯集》、《紀年錄》一卷。

又案：《藏書志》別有明馮懋卿刊十八卷本。今入守先閣本。

指南錄

宋文天祥撰。

元刊二本。

志

宋少保右丞相信國公文山指南錄一卷吟嘯集一卷附錄一卷指南後錄三卷傳一卷 元刊本。

宋文天祥撰，傳許有壬、劉岳申撰。

案：《藏書志》別載，汲古閣舊藏宋刊《指南錄》四卷，二本。既收於皕宋樓本。《提

要》文山集條云：「《指南前錄》一卷、《後錄》二卷，則自德祐丙子天祥奉使入元營，問道

浮海，誓師閩粵，羈留燕邸，患難中手自編定者。《吟嘯集》，則當時書肆所刊行，與《指南錄》頗相複出。」

疊山文集

宋謝枋得撰。

明黃溥編，林光祖校刊。

明刊二本。

志

新刊重訂謝先生疊山文集五卷〔一〕 明刊本。

宋謝枋得撰。

王守文序。嘉靖乙卯。

案：《提要》云：枋得事蹟具《宋史》本傳。所著《易》、《詩》、《書》、三傳及《四書》

解，雜著，詩文，原本六十四卷。歲久散佚。明嘉靖中，揭陽林光祖爲廣信府知府，始以黃溥所校刊行世，僅分上下二卷。萬歷中，御史吳某所輯《疊山集》，又刻之上饒。編次錯迕，未爲精審。此本乃本朝康熙中弋陽和縣譚瑄所重訂，視舊本較爲詳備。此本即明嘉靖中黃溥校刊者也。

〔一〕 河田眉批：五卷當作二卷。

本堂集

宋陳著撰。

舊抄六本。

志

本堂先生文集九十六卷〔一〕 舊抄本。

宋陳著撰，曾孫陳煦編次。

蔣岩書跋。至大戊申仲夏。

案：《提要》作九十四卷，云：「著，字子微，號本堂，鄞縣人。寶祐四年進士。官著作郎，出知嘉興府。忤賈似道，改臨安通判。是集凡詩三十四卷、詞五卷、雜文五十五卷。據其原目，尚有講義二卷。此本有錄無書，蓋傳寫佚之矣。」

〔二〕河田眉批：卷廿七、廿八、四十八、四十九、五十、五十一、五十二、七十六、七十七、九十五、九十六缺。

虞齋續集

宋林希逸撰。

舊抄六本。

志

竹溪虞齋十一稿續集三十卷 舊抄本。

宋三山林希逸著，門人石塘林式之編。

林同序。咸淳庚午正月。

案：《提要》云：「《宋史·藝文志》載希逸有《虞齋前集》六十卷，久佚不存。惟此續集謂之《竹溪十一稿》者，尚有傳本，即此三十卷也。凡詩五卷、雜著一卷、少作三卷、記一卷、序一卷、跋一卷、四六三卷、省題詩二卷、輓詩一卷、祭文一卷、墓誌二卷、行狀二卷、學記四卷。其門人林式之所編，共十三類。而謂之十一稿，不詳其故。或十中存一之意歟。」禮類《考工記解》云：「希逸，字肅翁，福清人。端平二年進士。景定間官司農少卿，終中書舍人。」

〔二〕「前集」原誤作「集前」，今據《四庫提要》改正。

王魯齋集

宋王柏撰，清順治甲午馮如京校。

十卷，附刻二卷，補遺一卷。

刊四本。

《藏書志》不載。

案：《提要》：「《魯齋集》二十卷，宋王柏撰。柏好妄逞私臆，竄亂古經。《詩》三百篇，重爲刪定。《書》之周誥殷盤，皆昌言排擊，無所忌憚。殊不可以爲訓。中略。其詩文雖刻意收斂，務使比附於理，而強就繩尺，時露有心牽綴之迹。終不似濂溪諸儒深醇和粹自然合道也。特其勇於淬礪，檢束客氣，使縱橫者一出於正，爲足取耳。據正統六〔二〕年楊溥序，此集乃其六世孫四川按察司僉事迪所自編。」書類存目《書疑》云：「柏，字會之，號魯齋，金華人。受業於何基之門。基，黃幹弟子。幹，又朱子壻也，故托克托等脩《宋史》，以朱子之故，列柏於道學傳中。」

〔一〕六，《四庫提要》作「八」。

林屋山人漫稿

宋俞琰撰。

舊抄一本。

志

林屋山人漫稿一卷 舊抄本。

宋俞琰撰。

案：《提要》存目琰見頤宋樓本易類《周易集說》。云：是集詩僅一冊，附雜文數首，率淺

俗不足觀。其《題楊妃圖》絕句一首，及《食鰻辨》一篇，尤爲鄙俚。蓋琰以數學著，不以文章著也。後人重其高名，搜錄遺篇存之，轉爲疵累耳。

林屋山人漫稿

同上。

抄一本。古梅遺稿合抄。

此本《藏書志》不載。

白玉蟾集

宋葛長庚撰。

明刊四本。

志

海瓊白玉蟾先生文集六卷續文集二卷 明刊本。

宋白玉蟾撰。 前有事實。 宋彭耜撰。

潘枋叙。 端平丙申日長至。

南極老人臞仙序。 正統壬戌。

案：是書《四庫》未收，阮元進呈《擘經室外集》云：重編《海瓊白玉蟾文集》六卷，續集二卷。宋葛長庚撰。按：長庚，字白叟，福之閩清人。七歲能詩賦，父亡母嫁，棄家遊海上，號海瓊子。至雷州繼白氏後，改姓白名玉蟾，傳以爲仙去。所著詩文集凡四十卷，具詳事實中。此本乃明正統間南極遐齡老人臞仙重編，前有宋端平時推官潘枋〔二〕原序，及嘉熙元年相所書事實一篇。黃虞稷《千頃堂書目》載是集臞仙序中，述及玉蟾有《上清》、《玉隆》、《武夷》三集內未入者，皆收之。今重新校正，定爲八卷，附錄一冊，及霞侶奉酌之元簡，仍綴諸卷末，而壽諸梓，以永其傳焉。臞仙乃明太祖第十六子寧

獻王朱權之號，博古好學，凡群書有秘本，莫不刊布，著述之富，一時無有及者。

〔一〕 河田眉批：枋本書作枋。

海瓊集

同上。

明刊五本。

志 白玉蟾海瓊稿十卷 明刊本。

宋白玉蟾撰。

唐胄序。嘉靖癸巳。

羅滄洲集

宋羅公升撰。

舊抄一本。《孫耕閒集》合抄。

志 宋貞士羅滄洲先生詩集五卷 舊抄本。

宋羅公升撰。

劉辰翁序。丙子六月。

顧氏手跋曰：滄洲翁，名公升，字時翁，吉之永豐人。大父開禮。宋咸淳間由胄監登第。授袁州教授，尋改武岡。德祐丙子文丞相開督府于閩廣，號召天下勤王，辟開禮知縣事，授安撫使。後兵敗被執，不食死節。即辰翁序中所云水心翁也。滄洲少有才略，以軍功授本邑教。傷大父死節，傾資北遊燕趙，與宋宗室趙孟榮諸公，圖復宋祚。知勢不可爲，回經錢塘江，作《弔胄濤》以自寓，今載集中，餘亦多感憤語。《永豐志》云：尚有《石初集》，則未見也。